

Ny domstolstruktur - Høyringssvar frå Ulvik herad

Ved tidlegare drøftingar omkring domstolstruktur for vår region, har Ulvik herad meint at det beste ville vera å oppretthalda tingretten på Lofthus, dvs Hardanger tingrett. Det er difor naturleg, når spørsmålet om dette kjem opp på nytt, at ein held fast ved dette standpunktet. Dette sjølv om det resulterer i ei reversering av iverksett domstolreform.

Ulvik herad meinar også at det bør vera leiar ved krav domstol, i hvert fall i vår region, dvs eigen domstolleiar ved Hardanger tingrett. Krav om innføring av felles digital løysing, der alle domstolar nyttar same system må iverksetjast.

Ulvik herad støttar departementet sin skepsis til å innføre felles saksinntak. Kvar domstol bør ha sitt eige saksinntak, men dei bør førast i det same digitale sakssystemet, slik at ein overordna domstol-administrasjon har heil og full oversikt.

Samarbeid på tvers av domstolar kan til dømes handla om at mindre domstolar spesialiserer seg på enkelte type saker, slik at ein samlar kompetansen på ein type sak i den eine domstolen, og på eit anna spesialfelt ved den andre domstolen. Slike samarbeid må vera forpliktande, dvs at den eine parten ikkje kan sei opp avtalen utan vidare.

For barnesaker er dette litt meir komplisert. For det første må det løvvast nok midlar til at ein har dommar med kompetanse på barnesaker ved kvar domstol, evt med unntak av domstolar som inngår samarbeid om denne type saker med ein annan domstol. Noreg kjem ofte dårleg ut i barnesaker, og dette må det gjerast noko med nasjonalt. Eit viktig steg i rett retning vil vera å kreva at det finst dommarar med kompetanse på dette saksområdet i kvar tingrett. Staten er rask med å kreva at kommunane har kompetanse på det meste, uavhengig av storleiken på kommunane, eksempelvis krav om psykolog og nytt krav om barnekoordinator (oppvekstreformen). Her må staten stilla same kravet til seg sjølv, slik at ein får plass nødvendig kompetanse i alle tingrettar.

Rekrutteringsutfordringar knytt til jordskifterettane må ein ta på alvor og forslaga som vert gjort greie for i høyringsnotatet, mellom anna lønsvilkår og utdanningstilbod vert støtta.

Ulvik formannskap – Sak 012/22 – Vedtak:

- 1. Ulvik herad stiller seg bak uttalen frå Hardangerrådet IKS datert 8.november 2021.**
- 2. Det er ikkje tilrådeleg med eige saksinntak, men det bør på plass felles digitalt sakssystem.**
- 3. Det bør vurderast forpliktande samarbeid mellom mindre domstolar, der enkelte domstolar har spesialkompetanse på enkelte type saker, og andre kontor på andre saksområde.**
- 4. Det er viktig at det vert gjort grep for å sikre betre rettstryggleik for barn og at barnesaker får ei betre domsbehandling. Alle domstolar må ha kompetanse på barnesaker, evt sikra slik kompetanse gjennom samarbeid med andre domstolar.**